

象頭精舍經
伽耶山頂經

古籍

百五十九
毀四

48373



皇圖
 聖業
 固
 帝
 漸
 銀
 昌
 佛
 日
 增
 輝
 懋
 輪
 常
 轉
 山
 城
 州
 天
 安
 寺
 法
 金
 剛
 院
 置



二經同卷

象頭精舍經

大乘伽耶山頂經

佛說象頭精舍經

隋天竺沙門毗尼多流支譯

如是我聞一時婆伽婆住伽耶城象頭精舍

尔時如來成佛未久與大比丘眾滿足千人
皆是過去往昔螺髻仙人所作已辦棄捨重
擔久離生死盡諸煩惱平等空慧正受智心
一切覺知到於彼岸皆阿羅漢復與無量大
菩薩摩訶薩眾俱尔時世尊獨坐思惟入諸
三昧遍觀法界自覺成道具一切智所作已

毀

訖棄諸重擔度生死流捨離慳貪拔三毒刺
盡諸渴愛集大法船擊大法鼓吹大法螺建
大法幢已斷生死演說正法閑諸惡趣開善
道門永離惡土遊諸淨國我觀彼法誰修菩
提誰得菩提誰欲得者過去現在及以未來
誰之所證爲是身得爲心得乎若以身得是
身無知猶如草木沙礫墻壁無所覺知四大
和合父母所生常須飲食衣服澡浴摩拭終
歸敗壞是磨滅法是菩提者但有空名而無
實相無聲無色無成無見無入無知無去無
來如是等法亦無繫縛能過諸法超出三界
無見無聞無我我所無作者無處所無窟宅

無取無著無出無入無願無住無相無貌無
彼無此無示猶如幻化以十二因緣生無處
所不可見離相如虛空現寂靜無聲無響無
文無字亦無言說如是知者是名菩提若以
心得是心無定猶如幻化皆因過去妄想業
生無形無執猶如虛空菩提者無有處所非
過去非未來非現在一切法空雖復言說有
名無實是無為法空無相無作非有非無非
可示現無說無聞夫菩提者非過去得非未
來得非現在得亦不離三世得無相非作非
不作若能如是覺了三世法者即是菩提
尔時文殊師利童子白佛言世尊若無相是

菩提者今善男子善女人等因何而住得成
菩提佛告文殊師利諸菩薩等學菩提者應
如是住文殊師利白佛言世尊諸菩薩等應
云何住佛告文殊師利夫菩提者超出三界
越於言說離諸文字無有住處復次文殊師
利菩薩摩訶薩住無所住是住菩提住無執
著是住菩提住於空法是住菩提住於法性
是住菩提住一切法無有體相是住菩提住
無量信是住菩提住無增減是住菩提住無
異念是住菩提住如鏡像如空谷響如水中
月如熱時炎文殊師利住如是等法是住菩
提尔時淨光炎天子白文殊師利童子言云

何修行以何等業是菩薩行文殊師利言天子於諸衆生起大慈心是菩薩行天子復白文殊師利諸菩薩等云何修行起大慈心文殊師利言天子無諂誑心是菩薩大慈天子復白文殊師利云何修行得無諂誑文殊師利言天子於一切衆生起平等心是無諂誑諸菩薩等應如是學天子復白文殊師利菩薩摩訶薩云何修行於一切衆生起平等心文殊師利言無彼無此無諸異見是平等行諸菩薩等應如是學天子復白文殊師利菩薩摩訶薩復云何修無彼無此無諸異見於一切衆生起平等行文殊師利言天子善念

恭敬無彼無此無諸異見及平等法諸菩薩
等應如是修天子復白文殊師利菩薩摩訶
薩善念恭敬乃至無彼無此無諸異見因何
而起文殊師利言天子善念恭敬因發菩提
心諸菩薩等應如是學天子復白文殊師利
菩提心者因何而起文殊師利言天子菩提
心者從六波羅蜜起天子復白文殊師利六
波羅蜜從何而起文殊師利言天子從方便
智慧起天子復白文殊師利菩薩摩訶薩方
便智慧從何而起文殊師利言天子方便智
慧從不放逸起天子復白文殊師利不放逸
者復從何起文殊師利言天子不放逸者從

修三善業起天子復問修三善業因何而起
文殊師利言天子從修十善業起天子復問
修十善業因何而起文殊師利言天子從善
攝身口意起天子復問文殊師利此三善業
復因何起文殊師利言從善思惟起天子復
問善思惟者因何而起文殊師利言從善思
觀行起天子復問善思觀行因何而起文殊
師利言從憶持不忘起天子復問憶持不忘
有幾種心以何因緣而得果報文殊師利言
天子菩薩摩訶薩有四種發心從因得果何
等爲四一者初發心二者係念修行三者不
退四者與善同生因初發心而得係念因修

係念得不退轉因不退轉與善同生復次天子初發心者猶如種子種之良田係念修行猶如苗生修行不退猶如莖幹枝葉增長與善同生猶如華果結實成熟發心係念修行不退與善同生亦復如是復次天子初發心人猶如車匠善知衆木繼念修行猶如合木修行不退猶如車成與善同生猶如載用發心繼念修行不退與善同生亦復如是復次天子初發心者猶如初月繼念修行如五日月乃至七日月修行不退如十日月與善同生如十四日月如來智慧滿足無缺如十五日月發心繼念修行不退與善同生亦復如

是復次天子初發心人過聲聞地第二發心
過辟支佛地第三發心過不定地第四發心
得於定地復次天子如噫啊等音悉是一切
字之根本初發心者亦復如是悉是一切善
之根本如學文字得少分智繼念修行亦復
如是得少分智猶如筭師摠計無量知其分
齊不退轉心亦復如是知心不退譬如有人
明解經論與善同生善心明了亦復如是復
次天子初發心者繼念善因第二發心繼念
智慧第三發心繼念禪定第四發心繼念於
果復次天子初發心者受持善因第二發心
受持智慧第三發心受持禪定第四發心受

持於果復次天子初發心者善因成就第二
發心智慧成就第三發心禪定成就第四發
心正果成就復次天子初發心者因善入道
第二發心因智入道第三發心因禪入道第
四發心因果入道復次天子初發心者如醫
識藥第二發心善知藥分第三發心隨病授
藥第四發心令得服行復次天子因初發心
生法王家第二發心學法王法第三發心修
法王行第四發心滿足王位是名四種發心
余時淨光炎天子白文殊師利何等是菩薩
摩訶薩速疾道菩薩行是道疾得阿耨多羅
三藐三菩提文殊師利言天子速疾道有二

種菩薩摩訶薩乘此二道疾得阿耨多羅三
藐三菩提何等爲二一者方便道二者般若
道受持方便智故能觀一切衆生受持般若
故觀一切法空能斷疑執以方便智故和合
諸法以般若故諸法不合方便爲因般若爲
果以方便故知一切法以般若故知諸法空
以方便智莊嚴佛國以般若故知諸佛國皆
悉平等以方便故知諸衆生根性差別以般
若故知諸衆生根性皆空以方便故得甘露
味證成菩提以般若故覺諸佛法平等正道
復次天子復有二行能令菩薩摩訶薩疾得
阿耨多羅三藐三菩提何等爲二一者有爲

二者無爲有爲者摠攝五波羅蜜無爲者摠攝般若波羅蜜復有二行能令菩薩摩訶薩疾得菩提何等爲二一者有漏行二者無漏行有漏行者五波羅蜜無漏行者般若波羅蜜復有二行能令菩薩摩訶薩疾得菩提何等爲二一者住行二者不住行住行者五波羅蜜不住行者般若波羅蜜復有二行能令菩薩摩訶薩疾得菩提何等爲二一者有量二者無量有量者五波羅蜜無量者般若波羅蜜有量行者是有相法無量行者是無相法復有二行能令菩薩摩訶薩疾得菩提何等爲二一者智行二者定行以智行故從初

地至七地以定行故從八地至十地尔時不
怯弱智揔持菩薩白文殊師利童子菩薩摩
訶薩云何知義云何知智文殊師利言善男
子義者無體智亦無體不怯弱智揔持菩薩
復問文殊師利云何義無體智亦無體文殊
師利言善男子義無體者無爲無作無相無
貌無來無去是名爲義智無體者非定法非
不定法是名爲智如是受持義者無體非有
非無智者體空非有非無無取無捨如是受持
復次義者非定非非定智者名爲心道心智
平等無有分別如是受持復次智者以禪爲
體禪智平等無有分別以方便故觀陰入界

十二因緣生死流轉善惡之相猶如幻化非
有非無菩薩摩訶薩應當如是觀於諸法復
次善男子菩薩摩訶薩復有十種智行何等
為十一者因智二者果智二者義智四者方便
智五者般若智六者受持智七者波羅蜜智
八者大悲智九者憐愍教化衆生智十者不
著一切諸法智是名菩薩十種智行復次善
男子菩薩摩訶薩發十種清淨行何等為十
一者自發身業清淨行二者發一切衆生身
業清淨行三者自發口業清淨行四者發一
切衆生口業清淨行五者自發意業清淨行
六者發一切衆生意業清淨行七者發一切

衆生清淨平等行八者發一切衆生外清淨
平等行九者發諸佛清淨智行十者發淨佛
國土成就衆生行若有衆生遇諸疾病給施
醫藥令得安樂具煩惱者以無爲智而教化
之令離三界悉令滿足功德智慧無爲之道
是名菩薩具足十種清淨之行復次善男子
菩薩摩訶薩有十種方便何等爲十一者彼
岸方便二者受持方便三者智慧方便四者
方便方便五者大悲方便六者智滿足方便
七者慧滿足方便八者靜念方便九者真實
行方便十者於一切衆生無諸憎愛平等方
便是名菩薩十種方便復次善男子菩薩摩

訶薩有十種分別身無盡何等爲十一者分
別事物無盡二者分別煩惱無盡三者分別
法無盡四者分別渴愛無盡五者分別諸見
無盡六者分別善惡無盡七者分別造作無
盡八者分別無執無著無盡九者分別和合
無盡十者分別菩提智圓滿無盡是名十種
分別身無盡復次善男子菩薩摩訶薩有十
種調伏行何等爲十一者調伏善行二者調伏
慳悋捨施如兩行三者調伏不精進行四者
調伏三業行五者調伏毒心不瞋怒行六者
調伏起慈愍心行七者調伏懶惰心行八者
調伏勤修佛法行九者調伏不善心不行諸

惡行十者調伏禪定解脫自在行復有十種
調伏行何等爲十一者調伏破愚癡無智行
二者調伏方便揔持般若波羅蜜行三者調
伏煩惱行四者調伏生起道行五者調伏揔
持信實行六者調伏不墮惡道行七者調伏
不善心行八者調伏時非時自在行九者調
伏自身行十者調伏觀空行是名十種調伏
行復次善男子菩薩摩訶薩有十種調伏地
何等爲十所謂調伏遠離身三惡業口四惡
業意三惡業復有十種內外觀法不起執著
何等爲十一者觀身外界皆悉是空不起執
著二者觀身外界亦悉是空不起執著三者


觀內外諸法皆悉是空不起執著四者於一切智不起執著五者所修行道不起執著六者觀諸賢聖地不起執著七者久修清淨不起執著八者住於般若波羅蜜不起執著九者於講論法教化衆生不起執著十者觀諸衆生起大方便慈悲憐愍不起執著是名十種內外觀法不起執著復次善男子菩薩摩訶薩應如是作堅固心修菩提道若不如是堅固菩提不名菩薩云何堅固身意等三業相應不相違背是名堅固云何不堅固身口意等三業不相應共相違背是名不堅固復次善男子菩薩摩訶薩復有二種正行堅固

菩提心何等爲二一者正念菩提行二者修
行禪定斷諸煩惱行是名二種正行堅固菩
提心復次善男子菩薩摩訶薩復有二種正
行堅固何等爲二一者自調身行二者調衆
生身行善男子是名菩薩摩訶薩二種正行
堅固復次善男子菩薩摩訶薩復有二種正
行堅固何等爲二一者勤修習故得一切智
二者不修習故而得一切智是名菩薩摩訶
薩二種正行堅固復次善男子菩薩摩訶薩
復有二種正行堅固何等爲二一者住地方
便正行堅固二者住地不動正行堅固是名
菩薩摩訶薩二種正行堅固復次善男子菩

薩摩訶薩復有二種正行堅固何等爲二一
者遠離染地正行堅固二者於地地方便自
行圓滿正行堅固是名菩薩摩訶薩二種正
行堅固復次善男子菩薩摩訶薩復有二種
正行堅固何等爲二一者於聲聞辟支佛地
示現正行堅固二者於佛菩提方便不退正
行堅固是名菩薩摩訶薩二種正行堅固善
男子菩薩摩訶薩以如是等正行堅固無量
方便當得阿耨多羅三藐三菩提
尔時世尊讚文殊師利童子言善哉善哉文
殊師利快說此語說此法時文殊師利無量
天人阿修羅乾闥婆等一切大衆聞佛說法

信受頂禮歡喜奉行

象頭精舍經



大乘伽耶山頂經

唐南天竺國三藏法師菩提留志等譯

如是我聞一時婆伽婆住伽耶城山頂精舍
與大比丘衆一千人俱其先悉是長髮梵志
皆阿羅漢諸漏已盡所作已辦捨諸重擔逮
得已利盡諸有結正知解脫心得自在到於
彼岸復與無量諸菩薩摩訶薩衆俱
尔時世尊得成正覺其日未久寂然宴坐入

于三昧觀察法界作是念言我已證菩提已
得聖智慧已辦所應作已捨諸重擔已出生
死曠野已捨離無明獲於智明已拔毒箭已
盡渴愛已證法界已擊法鼓已吹法螺已建
法幢已捨離生死眼說於法眼已閉惡道開
衆善道已捨非田示諸福田我今審觀如是
之法誰能現證已證當證為身證耶為心證
乎若身證者身是頑鈍無覺無思猶如草木
牆壁瓦石從於四大父母所生無常敗壞散
滅之法必假塗洗衣食等緣而得存立若心
證者心如幻化無相無形無所依處無所容
受又菩提者隨於世間而立名字無音響無

形色無成實無相狀無來無去不入過
於三界無有處所不可見聞不可憶念離攀
緣處非戲論境無所入無文字不可動搖不
可安立絕於一切語言之道而言現證已證
當證但惟名字虛妄分別無生無起無有體
性不可取不可說不可愛著是中實無已成

正覺現成正覺及當成者若能如是無證無
成乃得名為成正覺耳何以故菩提者離於
一切變動相故

尔時文殊師利菩薩摩訶薩知佛所念而作
是言世尊若菩提如是相者諸善男子善女
又發菩提心應云何住佛言文殊師利如菩

提相應如是住文殊師利菩薩言世尊何者是菩提相佛言文殊師利菩提相者獨超三界雖隨世俗而有名字遠離一切音聲言說諸菩薩衆發趣菩提從初發心則無所趣是故文殊師利諸善男子善女人應以遠離發趣之心而住菩提文殊師利若諸菩薩能發趣於無所趣者是則趣向菩提之道文殊師利趣於無自性是趣向菩提趣於無處所是趣向菩提趣於法界性是趣向菩提趣於一切法中無所執著是趣向菩提趣於實際無差別是趣向菩提趣於如鏡中像如光中影如水中月如熱時焰是趣向菩提

尔時衆中有天子名淨月威光白文殊師利
菩薩言大士諸菩薩摩訶薩修習何行依何
處修文殊師利菩薩言天子諸菩薩摩訶薩
修大悲行依於一切衆生處修淨月天子又
問言菩薩大悲依何心起文殊師利菩薩言
菩薩大悲依無諂誑心起又問言無諂誑心
依何而起答言無諂誑心依於一切衆生平
等心起又問於一切衆生平等心依何而起
答言依於入非一非異法性心起又問入非
一非異法性心依何而起答言依深信心起
又問深信心依何而起答言依菩提心起又
問菩提心依何而起答言依六波羅蜜起又

問六波羅蜜依何而起答言依方便慧起又
問方便慧依何而起答言依不放逸起又問
不放逸依何而起答言依三種淨行起又問
三種淨行依何而起答言依十善業道起又
問十善業道依何而起答言依持淨戒起又
問持淨戒依何而起答言依如理思惟起又
問如理思惟依何而起答言依觀察心起又
問觀察心依何而起答言從憶持不忘起又
尔時淨月威光天子復問文殊師利菩薩言
大士諸菩薩發菩提心凡有幾種於因於果
而得成就文殊師利菩薩言天子諸菩薩發
菩提心凡有四種於因於果而得成就何等

為四一者初發心二者解行住發心三者不退轉發心四者一生補處發心應知初發心為解行住因解行住發心為不退轉因不退轉發心為一生補處因一生補處發心為一切智因

復次天子應知初發心如田中下種解行住發心如牙漸增長不退轉發心如枝葉花果次第出生一生補處發心如果實成熟復次天子第一發心如造車人先集於材第二發心如得材已各別治淨第三發心如彼匠人造車成就第四發心如以其車引重致遠復次天子第一發心猶如初月第二發心如

五日夜至七夜月第三發心如十日夜月第
四發心如十四日夜月應知如來所有智慧
譬如明月至十五夜一切光色悉皆圓滿

復次天子第一發心超聲聞地第二發心超
辟支佛地第三發心超不定地第四發心任
決定地復次天子第一發心譬如有人初學

字母第二發心如彼學人漸解分析第三發
心如學已久善知算數第四發心如學成熟
了達諸論復次天子第一發心菩薩任因第
二發心菩薩任智第三發心菩薩任斷第四
發心菩薩任果

復次天子第一發心因所攝第二發心智所

攝第三發心斷所攝第四發心果所攝
復次天子第一發心從因而起第二發心從
智而起第三發心從斷而起第四發心從果
而起復次天子第一發心因差別分第二發
心智差別分第三發心斷差別分第四發心
果差別分

復次天子第一發心如採集眾藥第二發心
如分辨藥性第三發心如隨病合藥第四發
心如服藥除愈復次天子第一發心生法王
家第二發心學法王法第三發心學得解了
第四發心學得自在

亦時會中有天子名決定光明白文殊師利

菩薩言大士何者是菩薩摩訶薩速疾道諸
菩薩摩訶薩行此道疾得阿耨多羅三藐三
菩提文殊師利菩薩言天子菩薩摩訶薩速
疾道有二種諸菩薩摩訶薩行此道疾得阿
耨多羅三藐三菩提云何爲二一者方便道
二者般若道方便道者攝諸善法般若道者
了知簡擇方便道者不捨衆生般若道者能
捨諸法方便道者知法和合般若道者知不
和合方便道者能爲因緣般若道者能至寂
滅方便道者能知諸法差別之相般若道者
能知法界無差別理方便道者能具莊嚴諸
佛國土般若道者能知諸佛國土平等方便

道者能知衆生根行不同般若道者能知根
行空無所有方便道者令諸菩薩詣於道場
般若道者能令菩薩逮無所覺天子菩薩摩
訶薩復有二種速疾道云何爲二一者資糧
道二者波擇道資糧道者謂施等五波羅蜜
波擇道者謂般若波羅蜜有著道無著道有
漏道無漏道皆如是說復有二種速疾道云
何爲二一者有量道二者無量道有量道者
謂有相位無量道者是無相位復有二種速
疾道所謂智道及以斷道智道者謂從初地
至第七地斷道者從於八地至第十地
尔時會中有菩薩名勇修智信白文殊師利

菩薩言大士云何為菩薩摩訶薩所知義云
何為菩薩摩訶薩所修智文殊師利菩薩言
善男子義非和合智是和合勇修智信菩薩
言大士以何因故義非和合智是和合文殊
師利菩薩言善男子義是無為無為則非義
非義中無有法若和合若不和合義是無變
異無成實不可取不可捨皆如是說善男子
智名為道道與心和合非不和合復次善男
子智唯是和合非不和合勇修智信菩薩言
大士何因緣故智惟是和合非不和合文殊
師利菩薩言善男子智善能觀察蘊處界善
觀察緣起法善觀察處非處以是故惟和合

非不和合

復次善男子菩薩摩訶薩有十種智何等爲
十一者因智二者果智三者義智四者方便
智五者般若智六者攝智七者波羅蜜智八
者大悲智九者教化衆生智十者於一切法
無所著智善男子如是名爲菩薩摩訶薩十
種智復次善男子菩薩摩訶薩有十種發起
何等爲十一者身發起爲一切衆生淨治身業
故二者口發起爲一切衆生淨治口業故三者
心發起爲一切衆生淨治意業故四者內發
起於一切衆生無所取著故五者外發起於
一切衆生行平等行故六者智發起修習一

切佛智故七者國土發起示現一切佛刹功
德莊嚴故八者教化衆生發起知諸煩惱病
藥故九者真實發起能成就決定聚故十者
無爲智滿足發起於一切三界心無所著故
善男子如是名爲菩薩摩訶薩十種發起

復次善男子菩薩摩訶薩有十種行何等爲
十一者波羅蜜行二者攝物行三者般若行
四者方便行五者大悲行六者求慧資糧行
七者求智資糧行八者清淨信心行九者入
諸諦行十者不分別愛憎境行善男子如是
名爲菩薩摩訶薩十種行
復次善男子菩薩摩訶薩有十種無盡觀何

等爲十一者身無盡觀二者事無盡觀三者
法無盡觀四者愛無盡觀五者見無盡觀六
者資糧無盡觀七者取無盡觀八者無所執
者無盡觀九者相應無盡觀十者道場識自
性無盡觀善男子如是名菩薩摩訶薩十種
無盡觀

復次善男子菩薩摩訶薩有十種調伏行何
等爲十一者調伏慳嫉行捨施如雨故二者
調伏破戒行三業清淨故三者調伏瞋恚行
修習慈心故四者調伏懈怠行求法無倦故
五者調伏不善行得禪解脫神通故六者調
伏無明行生決定善巧慧資糧故七者調伏

諸煩惱行圓滿一切智資糧故八者調伏顛
倒行出生真實不顛倒資糧道故九者調伏
不自在行於時非時自在故十者調伏著我
行觀察諸法無我故善男子如是名為菩薩
摩訶薩十種調伏行

復次善男子菩薩摩訶薩有十種寂靜地何
等為十一者身寂靜地遠離三種身不善業
故二者口寂靜地淨治四種口業故三者心
寂靜地永捨三種意惡行故四者內寂靜地
不執著自身故五者外寂靜地不執著一切
諸法故六者智資糧寂靜地不執著所行道
故七者不自高寂靜地觀察聖智自性故八

者究竟邊際神通寂靜地出生般若波羅蜜
故九者滅戲論寂靜地不欺誑一切衆生故
十者不顧戀身心寂靜地大悲教化衆生故
善男子如是名為菩薩摩訶薩十種寂靜地
復次善男子諸菩薩摩訶薩如實行者能得
菩提不如實行則不能得如實行者如其所
說則如是行不如實行者但有言說不能信
受不能修習

復次善男子菩薩摩訶薩有二種如實行何
等爲二一者道如實行二者斷如實行善男
子菩薩摩訶薩復有二種如實行何等爲二
一者自調伏如實行二者教化衆生如實行

善男子菩薩摩訶薩復有二種如實行何等
為二一者有功用智如實行二者無功用智
如實行善男子菩薩摩訶薩復有二種如實
行何等為二一者善建立諸地如實行二者
善觀察諸地無差別如實行善男子菩薩摩
訶薩復有二種如實行何等為二一者善遠
離諸地過去如實行二者善圓滿諸地功德
如實行善男子菩薩摩訶薩復有二種如實
行何等為二一者善說聲聞辟支佛地如實
行二者善說諸佛菩提不退轉法如實行善
男子菩薩摩訶薩有如是等無量無邊如實
行法若能如是如實行者當知是人不久得

阿耨多羅三藐三菩提諸菩薩摩訶薩應勤
修學尔時世尊讚文殊師利菩薩言善哉善
哉文殊師利快說此語

佛說此經已文殊師利菩薩摩訶薩勇修智
信菩薩摩訶薩淨月威光天子決定光明天
子及餘衆會一切世間天人阿修羅等皆大
歡喜信受奉行

大乘伽耶山頂經

精舍
同卷

象頭精舍經

砂礫

下音

窟宅

上苦
骨反

係

音

莖幹

上古

耕反

噫

啊

二字
惡入

阿音
慳若

下良刃反
或作恡

大乘伽耶山頂經

分析

下光
擊反

蘊

紆粉
反

